


Adroddiad Blynyddol Antur Nantlle Cyf

2010 / 2011



Darlun o'r prysurdeb a fu ar www.nantlle.com

GAIR GAN Y CADEIRYDD

Fel Cadeirydd Bwrdd Rheoli Antur Nantlle fe'i hystyriaf yn fraint o gael cyflwyno'r Adroddiad Blynyddol am 2010 -2011. Mae'n grynodedb o'r hyn mae'r Antur wedi ei wneud yn ystod y flwyddyn ac yn rhoi darlun o'r sefyllfa ariannol.

Yn y lle cyntaf fe hoffwn ddiolch yn fawr iawn i Mrs Beryl Fretwell, Prif Swyddog yr Antur, am ei gwaith caled yn ystod y flwyddyn a hefyd am gynhyrchu'r Adroddiad hwn. Gyda gofid y dywedaf y byddwn yn ffarwelio â Beryl gan ei bod yn ymddeol o'r barchus arswydus swydd hon ddiwedd Mawrth y flwyddyn nesaf. Mae Beryl wedi bod gyda'r Antur o'r cychwyn cyntaf ac wedi bod yn weithreg ymroddedig a chydwybodol iawn ar hyd yr amser. Mae ei chyfraniad i lwyddiant yr Antur wedi bod yn aruthrol. Gweithiodd yn dawel a chydwybodol ac ati hi y daw pawb sydd eisiau gwybod unrhyw beth am yr Antur. Arni hi y mae aelodau'r Bwrdd wedi bod yn dibynnu am bob cyngor ac arweiniad. Bydd bwlch ar ei hôl ond dymunwn ymddeoliad hapus a dedwydd iddi.

Pleser hefyd yw croesawu tri aelod newydd i Fwrdd yr Antur, sef Craig ab Iago, Gwion Owain ac Owain Rowlands. Tri sydd â chonsyrn am ddyfodol a datblygiad Dyffryn Nantlle fel pawb ohonom sy'n ymwneud â'r Antur a bydd eu cyfraniad a'u harbenigedd yn werthfawr iawn i hybu economi'r Dyffryn ac i gadw ein hieuenctid mewn gwaith yn yr ardal.

Mae'r Cynllun Trydan Hydro bellach wedi cyrraedd cyfnod y cais cynllunio. Mae'r rhagolygon yn argoeli'n dda iawn ond mae llawer o waith caled i'w wneud eto cyn y gwiredir y cynllun. Mae hybu'r diwydiant twristiaeth eto yn rhywbeth sydd dan drafodaeth o hyd a gwireddu breuddwyd fyddai datblygu cynllun yn y maes.

Mae'r Antur wedi wynebu cryn gostau 'cynnal a chadw' yn ystod y flwyddyn ddiwethaf ond nid ydym wedi osgoi'r herion i drwsio a gwella'r adeiladau gan ei bod yn bwysig bod ein tenantiaid yn cael y telerau gorau posib.

Diolch yn fawr iawn i bawb am bob cefnogaeth i Antur Nantlle yn ystod y flwyddyn ddiwethaf. Teimlaf y gallwn gamu ymlaen i'r dyfodol gyda hyder a gobaith i ddod a budd a ffyniant i bobl ac ieuenctid Dyffryn Nantlle.

Ifan Glyn Jones
Cadeirydd

BWRDD RHEOLI ANTUR NANTLLE CYF 2010 - 2011



Ifan Glyn Jones, Cadeirydd Emrys Jones Is-gadeirydd



Cyng O P Huws



Dafydd Owen



Talfryn Griffiths



John Pritchard



Gwynne Williams



Cyng Dyfed Edwards



Elwyn Jones-Griffith



Richard Wyn Huws



Myrddin Williams



Owain Rowlands



Craig ap Iago



Gwion Owain

BWRDD RHEOLI ANTUR NANTLLE CYF

Ifan Glyn Jones (Cadeirydd)
Emrys Jones (Is-gadeirydd)
O P Huws
Dafydd Owen
John Pritchard
Talfryn Griffiths
Elwyn Jones Griffith
Dyfed Wyn Edwards
Gwynne Williams
Richard Wyn Huws
Myrddin Williams
Gwion Owain
Owain Rowlands
Craig ap Iago

Prifathro wedi ymddeol
Prif Swyddog Tân Cynorthwyol wedi ymddeol
Cynghorydd Gwynedd
Cyfarwyddwr Gwasg Dwyfor
Cyfrifydd
Cyfreithiwr
Prifathro wedi ymddeol
Cynghorydd Gwynedd
Peiriannydd gwresogi
Hunan gyflogedig
Swyddog Cyngor Gwynedd
Swyddog Prifysgol
Rheolwr Lleoliadau Digwyddiadau
Swyddog Prosiect Bwyd

YSGRIFENNYDD ANTUR NANTLLE CYF

Beryl Fretwell

Cynhaliwyd 6 chyfarfod o Fwrdd Rheoli Antur Nantlle yn ystod y flwyddyn ynghyd a chyfarfodydd o'r Grŵp Cyllid a'r Panel Personél. Cyfarfu'r Pwyllgor Eiddo a Thenantiaeth, y Grŵp Twristiaeth a'r Grŵp Hydro yn gyson hefyd.

Cynhaliwyd y Cyfarfod Cyffredinol Blyneddol ar 4ydd Dachwedd 2010

Yn unol â'r drefn ymddeolodd pedwar o gyfarwyddwyr o'r Bwrdd – Talfryn Griffiths, John Pritchard, Dyfed Edwards a Ben Gregory.

Ail etholwyd y pedwar.

STAFF ANTUR NANTLLE

Beryl Fretwell
Bet Hughes
Nerys Pritchard
Nia Wyn Noone

Swyddog Antur Nantlle
Gofalwraig y Ganolfan Dechnoleg
Gofalwraig y Ganolfan Fenter
Gofalwraig Tŷ Iorwerth

BANCWYR
HSBC Cangen Caernarfon

ARDAL ANTUR NANTLLE

Mae Antur Nantlle Cyf yn gweithredu yn ardal Dyffryn Nantlle a'r pentrefi cyfagos sy'n cynnwys: –

Carmel, Clynnog fawr, Dinas Dinlle, Y Fron, Y Groeslon, Llandwrog, Llanllyfni, Nantlle, Nasareth, Nebo, Penygroes, Pontllyfni, Talysarn, Tanrallt.

CYFLAWNIADAU 2010 / 2011

Swyddi wedi eu creu neu eu gwarchod	41
Nifer wedi cael budd o'r gwasanaethau a gynigir	2000
Nifer a dderbyniodd hyfforddiant	34
Mudiadau, cynlluniau a gweithgareddau cymunedol wedi cael cefnogaeth	14

CYFARFOD, TRAFOD A CHYDWEITHIO
gyda

Cyngor Gwynedd, Partneriaeth Talysarn a Nantlle, Ymddiriedolaeth Tir Dyffryn Nantlle, Cyfeillion Cae'r Gors, Y Ganolfan Gwaith, Coleg Harlech / WEA, Prifysgol Cymru Bangor, Cyngor Gweithredu Gwirfoddol Cymru, Canolfan Cydweithredol Cymru, Llywodraeth y Cynulliad, Amgylchedd Cymru, Bwrdd yr Iaith, Grŵp Gwefan Dyffryn Nantlle, Mantell Gwynedd, Cymorth i Ferched Cymru, Cymdeithas Tai Eryri, Ysgol Dyffryn Nantlle, Heddlu Gogledd Cymru, Grŵp Llys Llywelyn, Grŵp Canolfan Cymdeithasol Talysarn, Gŵyl Fai Dyffryn Nantlle, Cyngor Cymuned Llanllyfni, Cylch, Grŵp Awyr Agored Antur Nantlle, Neuadd Goffa Penygroes a nifer eraill o grwpiau a chymdeithasau yn y gymuned.

EIDDO A THENANTIAETH ANTUR NANTLLE (Cadeirydd – Emrys Jones)

Pwyllgor Eiddo a Thenantiaeth Antur Nantlle sy'n cadw llygad ar holl eiddo'r Antur, yn cynnal, cadw ac uwchraddio er mwyn sicrhau'r gwerth gorau am arian i'n tenantiaid. Dyma'r pwyllgor sy'n trin a thrafod ceisiadau am unedau'r Antur a braf yw adrodd fod ein hunedau a'n swyddfeydd yn parhau yn llawn a hynny mewn cyfnod economaidd anodd ymhob cwr o'r wlad. Bu'n rhaid i'r Antur godi rhywfaint ar y rhenti eleni ond credwn fod ein cyfraddau yn gystadleuol ac yn rhesymol o hyd.

Dyma ychydig mwy am ein gwahanol safleoedd:-

CANOLFAN DECHNOLEG ANTUR NANTLLE CYF / LLYFRGELL PENYGROES

20 Heol y Dŵr, Penygroes, Gwynedd LL54 6LR 01286 882688



Yn y Ganolfan Dechnoleg mae prif swyddfa Antur Nantlle, sydd ar agor ar y llawr cyntaf rhwng 9am - 5pm yn ddyddiol a chroeso i unrhyw un alw heibio. Dyma'r flwyddyn lawn gyntaf i'r Antur weithredu hefo un swyddog yn unig ac felly mae wedi bod yn flwyddyn brysur yn hanes y Bwrdd Rheoli yn ogystal ag i Beryl.



Beryl Fretwell, Swyddog Antur Nantlle

Gwelwyd newidiadau mawr mewn darpariaeth gyfrifiadurol ar draws y blynyddoedd a'r galw am hyfforddiant yn y maes wedi newid hefyd, serch hynny fe gynhaliwyd amrywiol gyrsiau yn yr ystafell hyfforddiant eto eleni. Diolch i Goleg Harlech / WEA am gydweithio ers y cychwyn cyntaf i gynnig darpariaeth safonol o hyfforddiant cyfrifiadurol ym Mhenygroes. Cynhaliwyd cyrsiau cyfrifiadurol sylfaenol yma yn ogystal â chwrs i rai mwy profiadol, hefyd Cymraeg i Rieni ynghyd a sesiynau Hel Achau drwy gynllun Cam Ymhellach sy'n gynllun rhad ac am ddim drwy lyfrgelloedd Gwynedd.

Diolch i Adran TG y Cyngor am wasanaethu ein rhwydwaith gyfrifiaduron ac i'r Ddesg Gymorth am drefnu a gofalu fod y neges yn eu cyrraedd.

Mae modd llogi'r ystafell hyfforddiant am bris rhesymol

LLYFRGELL PENYGROES
Llyfrgellydd - Gwenllïan M Williams
01286 880427



Er ein bod mewn dyddiau o brinder arian a son parhaus am doriadau yng nghyllid y gwasanaethau cyhoeddus, mae staff y Gwasanaeth Llyfrgell yn gweithio'n galed i sicrhau bod y gwasanaeth i ardal Dyffryn Nantlle yn parhau yn gyfoes gyda llyfrau newydd yn cyrraedd y Llyfrgell bron yn wythnosol. Mae yma ddigon o gyfrifiaduron at ddefnydd y gymuned yn ddi-dâl sy'n golygu nad oes rhaid i neb golli allan.

Mae croeso i bawb ddod draw i weld beth yw'r arlwy, mae yma rywbeth at ddant pawb - llyfrau safonol ar bob pwnc, llyfrau i'r ifanc a chornel arbennig i'r plant lle ceir amser stori a chrefftau ar amseroedd penodol.

Pleser yw llongyfarch Gwenllïan ar enedigaeth ei merch fach Lleucu. Dymuniadau gorau iddynt.

**SWYDDOG ADFYWIO BRO GWYRFAI NANTLLE
CYNGOR GWYNEDD**

Y Swyddfa Adfywio, Canolfan Dechnoleg Antur Nantlle, 20 Heol y Dŵr, Penygroes
01286 882968



Mae Kelvin wedi bod yn Swyddog Adfywio dros fro Dyffryn Nantlle ers 7 mlynedd erbyn hyn. Nod y cynllun Adfywio Bro yw cefnogi pobl leol i gyfrannu tuag at adfywio eu cymunedau trwy brosiectau economaidd, cymunedol, amgylcheddol a chymdeithasol.

Dros y flwyddyn ddiwethaf mae Kelvin wedi parhau i roi cefnogaeth i Ymddiriedolaeth Tir Cymunedol Dyffryn Nantlle, Cae'r Gors, Neuadd Goffa Penygroes, a chymorth i Antur Nantlle gyda chynlluniau Awyr Agored a'u cynllun Ynni Adnewyddol.

Os oes gennych chi syniad gwyh i wella eich cymuned a diddordeb sefydlu menter gymunedol newydd neu yn ymwneud â menter gymunedol sydd angen cefnogaeth cysylltwch â Kelvin.

.....

Drwy ddefnyddio gwasanaeth Antur Waunfawr rydym yn bwynt ailgylchu papur o bob math a chetris cyfrifiaduron.

Diolch yn fawr i Bet Hughes am gadw swyddfeydd y Ganolfan, y Llyfrgell a Siop 22 yn lân ac yn dwt bob amser.

CANOLFAN FENTER DYFFRYN NANTLLE

Ffordd Llanllyfni, Penygroes, Gwynedd LL54 6DB



Dyma gartref cyntaf yr Antur ac yma bu'r Swyddogion yn gweithio rhwng 1991 a 1999 pryd y symudwyd i'r Ganolfan Dechnoleg. Mae'r unedau bychain ar y safle wedi gweld amrywiaeth hynod o fusnesau bach yn mynd a dod ers amser agor y Ganolfan ac wedi bod yn llawn i gyd bron ers hynny. Mae'r ystafell gyfarfod ar gael i'w llogi i gwmnïau ac asiantaethau allanol ar gyfer cyfarfodydd, cyrsiau ayb am bris rhesymol.

Yn yr unedau heddiw mae modd prynu nwy potel a thrwsio eich offer torri gwair gan gwmni Torwoods, trin a llogi peiriannau 'mini diggers' gan Iolo Humphreys yn Uned 2, prynu rhannau ceir o Celtic Auto Parts, a llogi a thrwsio systemau PA gan Paul Hatt. Digon o amrywiaeth a bwrlwm felly yn y Ganolfan Fenter



Emma yn Uned Celtic Auto Parts



Joe Spooner, Torwoods

SIOP/GWEITHDY, 35 STRYD YR WYDDFA, PENYGROES

Oriel Llun-Mewn-Ffram (Meical Roberts 01286 882056)



Daeth cyfle i wella edrychiad y siop drwy gefnogaeth cynllun Gwella Blaen Siop Cyngor Gwynedd yn ystod y flwyddyn.

Hyn i gyd yn help i Meical Roberts wrth iddo arddangos ei waith celf gwreiddiol a phrintiau o waith rhai o artistiaid cyfoes gorau Cymru fel William Selwyn, Stephen John Owen, Aneurin Jones, Keith Bowen, Keith Andrew, Carys Bryn a Diane Williams. Mae Meical hefyd yn awyddus i gefnogi artistiaid lleol drwy eu hannog i ddangos eu gwaith yn yr oriel ac mae hefyd yn gwerthu nifer o grefftiau, gwaith coed a llechi, cardiau cyfarch, crysau, hwdis a mwy.



Dyma'r lle i fynd am wasanaeth fframio o safon uchel heb son am y croeso a phaned sydd ar gael gan Meical - cofiwch alw heibio!



Amrywiaeth o waith celf ac anrhegion lu ar werth yn Llun-Mewn-Ffram

FFLAT, 35 STRYD YR WYDDFA, PENYGROES



Yn ystod yr haf 2010 fe benderfynodd yr Antur fuddsoddi mewn adnewyddu fflat, 35 Stryd yr Wyddfa er mwyn cynnig cartref safonol i berson lleol. Diolch i gwmni O J Jones a'i fab am wneud y gwaith atgyweirio i safon uchel.

SIOP 22

10 Heol y Dŵr, Penygroes, Gwynedd LL54 6LR



Mae adeilad 10 Heol y Dŵr ym Mhenygroes wedi ei leoli mewn man canolog yn y pentref ac yn cynnwys tair swyddfa ar y llawr uchaf ac un swyddfa fawr ar y gwaelod. Cafwyd cymorth Cyngor Gwynedd drwy eu cynllun Gwella Blaen Siop i adnewyddu drws a ffenestri'r adeilad.

Ar ôl 10 mlynedd ffarweliwyd a Gruff Owen o Ymddiriedolaeth Addoldai Cymru wrth iddynt symud i Dremadog a hefyd a Marika Fusser a Cymorth Cynllunio Cymru. Dymuniadau da iddynt gyda'u cynlluniau yn y dyfodol.



Cwmni Matom sydd ar y llawr isaf - Claire Evans sy'n gweithio fel ysgrifenyddes i gwmni Matom



Justin Davies o gwmni Gringo Designs - mae Justin yn cynnig bob math o waith dylunio graffig ar y cyfrifiadur, cynhyrchu gwefannau, brandio, argraffu a mwy, cysylltwch â Gringo Designs yn Swyddfa 4 ar 01286 882561.

Y BARICS Nantlle, Caernarfon, Gwynedd LL54 6BD



Hen 'farics' yn perthyn i Chwarel Penyrsedd oedd Y Barics ers talwm ond erbyn heddiw yn unedau bychain at ddefnydd y gymuned a busnesau bychain.

Canolfan Llys Llywelyn yn Uned 2 Y Barics yw canolbwynt bywyd cymdeithasol y pentref gyda chriw prysur yn trefnu bob math o weithgareddau sydd yn dod a'r gymuned at ei gilydd.

Peter a Wendy Midwinter gyda 'Railways Unlimited' sydd yn Uned 3, sef cwmni yn trwsio, gwerthu a threfnu arddangosfeydd o drenau bach.

Yn Uned 4 mae Dyfrig Peris a Jennie Corr yn rhedeg cwmni Peris a Corr. Mae'r cwmni yn cynnig gwasanaeth argraffu â sgrin hefo inciau dwr - argraffu ar grysau T, bagiau cynfas ayyb. Maent hefyd yn cynllunio tecstiliau a chardiau cyfarch eu hunain. Mae'r holl waith papur a chardiau cyfarch yn cael eu hargraffu ar bapur wedi'i ailgylchu. Cysylltwch â Dyfrig a Jennie ar 01286 881787 www.perisandcorr.com



Daeth yn amser ffarwelio a Christine Matthews o Uned 5 ar ddiwedd y flwyddyn hon a dymunwn y dda iddi gyda'i gwaith celf yn y dyfodol.



Tŷ IORWERTH **39 Heol y Dŵr, Penygroes, Gwynedd LL54 6ES**



BANC YR HSBC

Mae gwasanaeth holl bwysig yr HSBC ar gael yn y pentref yn ddyddiol a gobaith pawb ydyw y bydd parhad i'r gwasanaeth am flynyddoedd i ddod.

Cymorth i Ferched Cymru - O'u canolfan ym Mhenygroes mae'r llinell gymorth trais yn y cartref yn cynnig gwasanaeth cyfrinachol dwyieithog 24 awr y dydd i ferched, plant a dynion drwy Gymru gyfan, sy'n dioddef camdriniaeth yn y cartref. (0808 8010800).



Rhian sydd yng ngofal
y llinell gymorth



Cris Jones sydd yn Swyddfa 6 yn gweithio fel cyfieithydd (01286 880444) a Ben Gregory yn Swyddfa 7 gydag Ymgyrch Nicaragua.

GRWP IAU DIWYDIANT AC ECONOMI ANTUR NANTLLE CYF

Dyma'r Grwpiau sydd yn cyfarfod i drin a thrafod cynlluniau economaidd a chwilio am brosiectau newydd er budd Dyffryn Nantlle. Mae hi'n gyfnod anodd, sydd wedi gweld lleihad mewn grantiau sylweddol i gwmnïau fel yr Antur ond mae'r drafodaeth yn mynd yn ei blaen a'r dyhead am weld gwelliant economaidd i Ddyffryn Nantlle yn dal i sbarduno. Yr ydym yn barod i drafod hefo unrhyw un sydd â diddordeb mewn ymuno a ni neu sydd â gweledigaeth ac yn barod i weithio o'i wirfodd er lles yr ardal. Mae dau brif grwp yn edrych ar gynlluniau ar hyn o bryd:-

- **Grŵp Ynni Adnewyddol Hydro Antur Nantlle**
Cadeirydd Dafydd Owen



Gyda'r llywodraeth yn annog grwpiau cymunedol i weithredu cynlluniau i leihau ôl troed carbon ac i roi ystyriaeth i'r newid yn yr hinsawdd fe sefydlwyd Grŵp Ynni Adnewyddol Antur Nantlle er mwyn canolbwyntio ar brosiectau yn y maes yn Nyffryn Nantlle.

Mae Dyffryn Nantlle yn ardal fynyddig sy'n cael digon o law ac o'r herwydd nid oes prinder dŵr yma, felly penderfynodd y Grŵp Ynni edrych yn fanylach ar ffyrdd o gynhyrchu ynni gwyrdd drwy ddefnyddio dŵr o afon fechan leol.

Derbyniwyd cymorth Cronfa Cynaliadwyedd Cyngor Gwynedd i wneud ymchwiliad desg ar yr afon fechan er mwyn canfod y posibilïadau. Cychwynnwyd ar y broses o drafod gyda'r tîrfeddianwyr, Asiantaeth yr Amgylchedd, Parc Cenedlaethol Eryri a Chyngor Gwynedd a chafwyd canlyniadau digon addawol i symud ymlaen i'r cam nesaf o baratoi astudiaeth lawn.

Gyda chefnogaeth grant Cronfa Datblygu Gwirfoddol Cyngor Gwynedd, comisiynwyd cwmni Dulas i gwblhau Astudiaeth Dichonoldeb llawn. Ar yr un pryd ariannodd yr Antur Astudiaeth Bryophytes er mwyn darganfod effaith posib y cynllun hydro ar blanhigion prin, pysgod, llygod dwr ayb.

Cyflwynwyd cais llwyddiannus am arian Ynni'r Fro i gyflwyno Cais Cynllunio, gwasanaeth cyfreithiol, trwydded tynnu dŵr ac Astudiaeth Archeolegol o'r safle. Mae pob cam yn y prosesau hyn yn cymryd amser ac nid gorchwyl hawdd ydyw datblygu'r cynllun gan fod rheolau gwlad wedi eu newid ar hyd y ffordd.

Ond bydd cwblhau'r cynllun hwn yn dod a budd economaidd positif trwy gynhyrchu refeniw i'r Antur, diogelu swyddi, cynorthwyo busnesau lleol trwy baratoi mannau gwaith rhesymol, creu swydd ychwanegol oddi mewn i'r Antur, arwain at ddatblygu cynlluniau economaidd eraill yn y dyfodol fydd yn gatalydd i greu mwy o swyddi a hefyd sefydlu cronfa grant leol i hybu busnesau newydd i gychwyn yn yr ardal.

Mae llawer o waith caled wedi ei wneud yn barod i'r cynllun hwn a llawer iawn o waith o'n blaenau eto ond mae'r Grŵp Hydro wedi ymrwymo i'r prosiect ac yn llawn hyder y byddant yn derbyn digon o gefnogaeth ariannol i weld gwireddu'r cynllun cyffrous ac amserol hwn er budd cymuned Dyffryn Nantlle

Grŵp Twristiaeth Antur Nantlle

Cadeirydd O P Huws

Mae'r Antur yn ymwybodol iawn o'r diffyg mewn adnoddau a chyfleon i ddenu twristiaid i Ddyffryn Nantlle. Teimlwn fod gan yr ardal cymaint i'w chynnig ac mae llawer o amser y Grŵp wedi ei dreulio yn trin a thrafod cynlluniau posib. Eisoes rydym wedi comisiynu Astudiaeth ar Dwristiaeth yn Nyffryn Nantlle, Astudiaeth Dichonoldeb ar sefydlu Cynllun Llety Ymwelwyr a Chanolfan Gweithgareddau Awyr Agored Dyffryn Nantlle a thrafod datblygu Gweithgareddau Awyr Agored hefo grŵp a diddordeb yn yr ardal.

Ein gobaith yn y flwyddyn nesaf ydyw adnabod cynllun penodol ym maes twristiaeth i'w ddatblygu er budd economaidd i Ddyffryn Nantlle.

DIWEDDGLO

Fel y cyfeiriwyd eisoes, dyma'r flwyddyn gyntaf i'r Antur weithredu hefo un swyddog yn unig. Dipyn o newid yn ein hanes fel cwmni ond os gwiredir ein cynlluniau, rhywbeth dros dro yn unig fydd hyn a'n gobaith fydd medru cynnig swydd ychwanegol eto o fewn y cwmni yn y dyfodol.

Yr un yw nod yr Antur ers ei sefydlu yn ôl yn 1991, sef datblygu cynlluniau ddaw a gwelliannau economaidd a chymdeithasol i Ddyffryn Nantlle. Wrth gwrs mae gennym gyfrifoldebau eraill erbyn hyn sef gwarchod ein hadeiladau a'n tenantiaid - a chan fod ein ffiniau oddi mewn i ardal Dyffryn Nantlle mae'r gwaith hwn llawer yn haws a ninnau yn un teulu mawr.

Fel y gwelwch ar gychwyn yr adroddiad hwn, mae wynebau newydd wedi ymuno a ni. Croeso cynnes i Owain, Craig a Gwion fel Cyfarwyddwyr newydd yr Antur. Diolch iddynt am gytuno i roi o'u hamser ac edrychwn ymlaen am eu cyfraniad.

Edrychwn ymlaen at y flwyddyn o'n blaenau. Gobeithio gweld gwireddu ein cynllun Hydro a datblygu cynllun i hybu'r diwydiant twristiaeth yn yr ardal.

Mae'r Antur yn barod i wrando a chydweithio felly os oes gan unrhyw un syniadau neu'n chwilio am bartner i wireddu cynllun yn yr ardal cofiwch gysylltu â ni - mae'r drws ar agor i unrhyw un sydd am weithio er lles yr arda hon.



